

四庫全書

史部

# 欽定四庫全書

史部

平定準噶爾方略正編卷三十七至四十

詳校官監察御史臣孫家賢

通政使司副使臣莫瞻菴覆勘

總校官進士臣朱鈐

校對官編修臣周厚輅

謄錄監生臣汪瀾

欽定四庫全書

平定準噶爾方略正編卷三十七

乾隆二十二年春二月癸酉

中諭提督傅魁辦理不協罪狀

上諭軍機大臣曰雅爾哈善等奏傅魁帶兵赴魯克察克會同額敏和卓擒獲莽噶里克妻孥并宰桑等十餘人俱行正法已撫定城中回衆令蘇賚滿駐劄等語由此觀之是擒獲莽噶里克之事皆額

敏和卓早為妥辦即使傳魁不往莽噶里克亦必  
成擒乃傳魁前至魯克察克欲掠額敏和卓之功  
以為伊所辦理實屬無恥著即遵前旨拏解來京  
審訊額敏和卓辦理一切甚屬妥協著賞緞六端  
以示鼓勵

甲戌

命調回巴里坤綠旗兵丁

上諭軍機大臣曰現在巴里坤所調滿洲索倫察哈

爾兵共五千名加以兆惠帶回官兵已數進勦之  
用所有調至巴里坤綠旗兵二千名原屬無用如  
從前派出種地兵丁尚屬不敷即派綠旗兵充補  
餘俱著遣回本營

乙亥

駐劄巴里坤辦事大臣雅爾哈善等疏奏派兵  
策應副將軍兆惠事宜

雅爾哈善等奏言正月三十日內大臣博爾奔

察副都統鄂博什帶領索倫第二起兵丁抵巴里坤臣等查副將軍兆惠等差人前來報信時已派索倫兵二百名前往接應今復派索倫兵二百八十名交鄂博什帶領已於二月初一日自巴里坤起程現在博爾奔察亦請帶兵前往臣即飭知劉順馬得勝等解送馬二千餘匹俟此項馬匹到時兆惠等約已可至巴里坤公同商議若須速行進剿即令博爾奔察領兵速往

倘賊衆已遁非千餘兵丁所能辦理仍俟大兵  
齊集一同前進奏入報

聞

已卯

命安插都爾伯特台吉布圖庫等

上諭軍機大臣曰唐喀祿奏稱據都爾伯特台吉布  
圖庫班珠爾等呈稱伊等與策凌相離年久無庸  
歸併同住請送至察哈爾安插等語布圖庫等既

不便與策凌同居自應另籌安插第察哈爾地亦無多若將此等戶口俱行送往恐於伊等生計無益著在呼倫貝爾及通肯呼裕爾等處令布圖庫等居住即傳諭策布登扎布等酌量辦理呼倫貝爾等處係黑龍江將軍所轄並著傳諭將軍綽爾多知之

定邊將軍成衮扎布等疏奏賞賜烏梁海宰桑兵丁事宜



成衮扎布等奏言查烏梁海游牧人衆前經臣  
遣員曉諭令其協同進兵伊等隨派出貝子彭  
楚克公丹拜兵六百名和托輝特兵一百六十  
餘名令伊宰桑等帶領駐劄哈勒塘嶺克木等  
處防禦逆賊青滾雜卜逃竄之路甚屬奮勇今  
蒙

恩議叙臣等所領官兵其烏梁海人等並請

天恩將宰桑數員准其戴翎兵丁酌賞緞尺茶葉等

物以示鼓勵奏入報

聞

庚辰

命叅贊大臣舒赫德仍帶噶爾藏多爾濟宰桑固穆  
扎卜等前往軍營

上諭軍機大臣曰黃廷桂等奏稱接雅爾哈善咨文  
知噶爾藏多爾濟叛跡已著前舒赫德自京帶往  
噶爾藏多爾濟宰桑固穆扎卜等四人現留肅州

請旨辦理等語伊等尚未識朕令固穆扎卜前去  
之意前舒赫德起程時朕令將固穆扎卜等帶往  
特因衆厄魯特等雖潛謀不軌而噶爾藏多爾濟  
尚無叛形是以令將伊屬人遣回游牧伊果無異  
心自必率衆歸誠彼時酌量情形原可從容辦理  
此時雖有雅爾哈善之咨而噶爾藏多爾濟實在  
情形究未深悉著仍將固穆扎卜等令黃廷桂送  
交舒赫德帶往如舒赫德等已接有擒拏噶爾藏

多爾濟之信即將固穆扎卜等停止前往毋庸拘  
泥此旨辦理

壬午

諭定邊將軍成袞扎布等防範賊人設計緩師事宜  
上諭軍機大臣曰上年大兵前往哈薩克阿逆尚未  
遠遁而賊人等屢次詭言擒獻我兵遷延不進遂  
致首惡脫逃朕面詢自軍營回來侍衛等皆衆口  
一詞則達爾黨阿等為賊所愚可為前鑒厄魯特

等生性狡詐此次大兵前進畏懼兵威必將逞其  
故智希冀緩我之師如果擒賊自効率衆歸誠必  
其人親至軍營叩轅籲請今並未見其人而但遣  
人來往其為緩兵之計無疑著傳諭成衮扎布等  
帶兵前進時應將此等詭稱擒獻賊人先行斬戮  
慎勿輕信賊言致墮奸計

命坤都爾巴圖魯總管巴寧阿墨爾根巴圖魯侍衛  
瑪璫馳驛赴巴里坤軍營聽候調遣

乙酉

宣諭軍營大臣等功過

上諭大學士曰上年逆賊阿睦爾撒納及阿布賚之  
得以脫身逃竄西北兩路領兵大臣彼此互相歸  
咎其時達爾黨阿等帶領西路官兵追捕阿逆相  
距不過里許乃為人所紿以致遠遁北路哈達哈  
等則既探知阿布賚所在任意遲延不即掩獲迨  
已逸去始勒兵追躡其後夫軍務機宜間不容髮

竟皆交臂失之其奚所歸咎前因一時委用乏人  
且事在萬里之外難以懸定必須查詢明確方可  
定其處分今詢之陸續自軍營來者則衆口一詞  
前後脗合是達爾黨阿哈達哈及同時叅贊諸臣  
均無所辭其責此等誤事之人若不明示譴責仍  
令安然保其爵位將來何以用人達爾黨阿哈達  
哈本身公爵及哈達哈之領侍衛內大臣俱著革  
退吏部尚書員缺著傅森調補工部尚書員缺著

納穆扎爾補授即兼管廂紅旗滿洲都統阿里衮  
著降補戶部侍郎兼管廂藍旗滿洲副都統所遺  
戶部尚書員缺著兆惠補授即兼管廂白旗漢軍  
都統兆惠此次調度有方甚屬勤勞并著授為領  
侍衛內大臣以示鼓勵其傅森之兵部尚書員缺  
著舒赫德補授仍兼管廂黃旗漢軍都統納穆扎  
爾之戶部侍郎員缺著雅爾哈善調補所遺兵部  
侍郎員缺著哈達哈降補即兼管廂藍旗漢軍副



都統達爾黨阿之廂藍旗滿洲都統員缺著雅爾  
哈善兼管其正白旗滿洲副都統員缺著達爾黨  
阿降補至兩路叅贊大臣哈寧阿現隨兆惠自伊  
犁回至軍營亦屬勤勞著免其議處扎拉豐阿鄂  
實富德唐喀祿俱著交部察議朕於諸臣功過賞  
罰予奪一秉至公毫無成見惟視人之効力何如  
耳將此通行傳諭知之

定邊右副將軍兆惠等疏奏沿途勦滅賊衆事

宜

兆惠等奏言臣等於上年十一月十四日因阿卜達里托賚及阿察郭勒臺站為噶勒雜特人搶掠派副都統三格帶兵二百名前往接續臺站十九日阿巴噶斯宰桑庫圖齊遣人報稱噶勒雜特齊默特庫等告知扎那噶爾布等已搶臺站並將扎那噶爾布哈薩克錫喇等傳示各台吉宰桑之文呈送係列噶爾藏多爾濟為首

共謀肆逆之詞據庫圖齊等雖稱擒拏齊默特庫等送至軍營候至二十五日尚未送到而臣等傳喚宰桑吞圖布莽鼐等亦並未至軍營情形可疑臣等即領兵自濟爾哈朗起程二十六日至鄂壘扎拉圖地方賊人突至交戰一次二十七日據三格報稱擒戮搶掠安濟哈雅臺站之呼爾璘賊衆五十餘人嗣據遣往庫圖齊納爾鄂拓克之副護軍校兆坦藍翎諾爾木等回

至軍營告稱聞宰桑吞圖布屬人共言達什策  
凌哈薩克錫喇尼瑪等在哈薩克地方即同謀  
叛逆現在鄂拓克兵丁俱已齊集等語十二月  
初一日遇賊兵數千欲來迎戰大兵半係步行  
堅拒自守不即與之交戰賊見大兵馬力平常  
俱不設備臣等令索倫委署營總伊靈阿三達  
保帶領精兵於初三日五更時潛行出營乘賊  
不備奮力衝擊賊衆紛紛敗走復派侍衛齊努

渾領兵一百餘名協力攻戰斬賊四五百名復將逃匿林藪賊人盡行勦殺此二次交戰官兵陣亡三十四人都統莽阿納及官兵得傷者一百四人共斬賊千餘人收獲駝馬軍器甚多詢問生擒賊人據供宰桑內達什策凌為首圖布慎塔什布圖庫莽鼐都噶爾訥默庫等同謀叛逆惟吞圖布曾經阻止衆人不從等語十五日由烏蘭烏蘇至闊勒奇哈地方擒勦呼爾璦台

吉圖爾根等戶口拏獲圖爾根供稱呼爾瑞台  
吉賽音伯勒克鄂爾椿等一百餘戶在喀喇烏  
蘇居住納木奇現將游牧移往齊爾地方等語  
臣隨派三格帶兵擒拏將賽音伯勒克等戶口  
盡行勦殺惟鄂爾椿帶領數人逃脫收獲馬駝  
等物二十三日至呼圖畢地方將坐臺厄魯特  
孟克拏獲據供係噶爾藏多爾濟屬人現在噶  
爾藏多爾濟在羅克倫游牧並未從賊等語臣

等即遣藍翎愛新泰副護軍校兆坦持檄前往  
曉諭噶爾藏多爾濟令其領兵來會二十八日  
至羅克倫地方拏獲噶爾藏多爾濟屬人諾爾  
布據稱噶爾藏多爾濟已帶兵遷至昌吉河源  
居住復遣副護軍校塔克慎獎賞藍翎濟蘭泰  
令諾爾布引導前往守候二日未回臣等領兵  
起程初五日至烏魯木齊初六日遇賊衆追至  
交戰一日至夜往刦賊營知己逃避查軍營內

馬駝無多口糧亦少暫令堅守乘賊勢懈怠再行勦滅十一日遣往噶爾藏多爾濟曉諭之兆坦等回營告稱持檄赴彼即為伊屬人擒拏現在噶爾藏多爾濟扎那噶爾布尼瑪哈薩克錫喇鄂哲特等會兵前來迎戰將同往之愛新泰羈留給文令伊回來臣等閱噶爾藏多爾濟文內有從前將伊等騷擾今請軍營大臣赴彼游牧面陳之語詞語悖逆深屬可惡臣等並未給



與回文自十二日至十七日賊衆千餘連次攻戰至十八日噶爾藏多爾濟等始行遁去臣等於二十三日起行赴特訥格爾地方復遇賊二百餘人鏖戰一次二十六日見賊數百人繞道而去捉生詢問知是迎截巴里坤前來應援官兵臣等擬從後夾攻而賊人藏匿樹林誘之不利追之則避軍營火藥馬匹弓箭已屬無多守至二十八日臣等曉諭官兵現在口糧不過十

日若不併力死戰徒致坐困於事無益衆皆鼓  
勇爭先一以當百定於三十日起程適遇遣來  
迎接之侍衛圖倫楚達禮善等帶兵八百名沿  
途殺賊而至將布拉罕地方邀截大兵之扎那  
噶爾布尼瑪等二百餘賊擊敗其餘賊衆聞風  
逃竄此皆

皇上洞燭幾先遣兵策應使臣等二千官兵得以振  
旅而回再造之

恩雖捐糜踵頂不足以報查圖倫楚等乘騎馬匹遠  
道遄行亦皆疲乏賊衆游牧已遷至烏魯木齊  
不能追及且所帶口糧僅敷數日是以臣等議  
將兵丁口糧通融散給即遵

旨前赴巴里坤如巴雅爾扎哈沁等游牧未經遠竄  
即前往攻襲總之準噶爾人等罪惡貫盈必應  
盡行勦滅至賊衆伎倆臣等俱已深悉將來大  
兵齊集一由額林哈畢爾噶一由吐魯番朱爾

都斯空格斯等處兩路前進自能殲滅賊衆厄魯特俱行翦除回衆自必傾心歸順奏入

上諭大學士曰前因副將軍兆惠領兵勦賊全師而出遣人調取援兵於雅爾哈善奏到時曾降恩旨今覽兆惠等所奏其沿途與賊交戰甚為勞苦兆惠等所領並非進勦之兵且馬匹無多官兵等竟能同心奮勇遇賊盡行勦滅振旅而回實堪嘉予兆惠三格哈寧阿永貴莽阿納已加恩封賞其侍

衛齊努渾奮勉行走著授為頭等侍衛賞給額爾克巴圖魯名號并賞銀一百兩兆惠等獎給孔雀翎之領隊署營總伊靈阿三達保俱著授為二等侍衛再前此兆惠報到署護軍校納蘭圖署防禦成果與額魯特色勒勒減額魯特戶口經朕加恩納蘭圖成果俱賞給孔雀翎色勒授為三等侍衛各賞銀五十兩今兆惠等既奏稱成果納蘭圖額魯特達爾漢等常在哨探隊內行走等語成果納

蘭圖額魯特達爾漢俱著授為三等侍衛仍著兆惠等將此次奮勉行走暨陣亡受傷人等查明送部分別議叙賞卹圖倫楚所領官兵曾經出力者亦著兆惠查明一同報部議叙

侍衛圖倫楚等疏奏沿途勦賊情形

圖倫楚等奏言臣等遵

旨帶兵八百名於上年十二月二十八日自巴里坤起程正月十九日至伊勒巴爾和碩地方勦殺

巴雅爾屬人一百餘戶嗣遇副將軍兆惠遣往  
巴里坤報信兵丁二名據稱兆惠現在烏魯木  
齊地方堅守隨令一人馳赴巴里坤臣等帶領  
一人令其嚮導行走至濟爾瑪台地方殲滅哈  
薩克錫喇屬人二十餘戶二十七日遇阿察郭  
勒逃出之沙克都爾曼濟所屬得木齊索諾木  
車楞等百餘人俱行殲滅次日復勦殺扎哈沁  
百餘人二十九日至察罕烏蘇巴雅爾宰桑達

巴扎哈沁宰桑塔爾巴津等帶領兵丁二百餘人迎戰復行勦滅并擒獲達巴塔爾巴津等詢問兆惠信息據稱現在駐守特訥格爾地方扎那噶爾布尼瑪鄂哲特等領兵迎戰等語臣等隨將達巴塔爾巴津正法前赴兆惠駐劄地方是日一更時方與兆惠等會合此數次攻戰所獲牲隻甚多除給兵丁口糧外其餘駝馬等物分給自濟爾哈朗回來兵丁今於二月初一日



起程赴巴里坤奏入報

聞

諭定邊將軍成袞扎布等分路進剿事宜

上諭軍機大臣曰頃據兆惠等奏請兩路進兵擒剿賊衆所奏甚合機宜此時成袞扎布應已到巴里坤即著成袞扎布會同兆惠分路帶兵前進務期同心協力迅奏膚功從前曾降諭旨令將回部事宜從容籌辦今看此情形大兵一進即可剿滅賊

衆厄魯特等既皆翦除則回部自可招服並著成  
衮扎布等妥協籌辦再昨經舒赫德等奏請將噶  
爾藏多爾濟宰桑固穆扎卜暫留肅州朕以噶爾  
藏多爾濟宰桑固穆扎卜仍行帶往今觀兆惠所  
奏噶爾藏多爾濟竟敢首為叛逆固穆扎卜著即  
留肅監禁候旨再行辦理又吞圖布圖布慎等此  
次雖未同謀叛逆然不可仍留彼處曾降旨令解  
送來京倘稍有可疑亦即正法以絕根株毋貽後

惠前派鄂實為兆惠叅贊大臣額爾登額領隊行走今兆惠隊內原有哈寧阿永貴三格同辦事務除派一員遵旨來京尚有二人足資助理鄂實仍著同成袞扎布辦事富德著同額爾登額在兆惠隊內領隊行走軍營現在辦事人員甚多莽阿納著即行回京

辛卯

命獎賞定邊右副將軍兆惠等

兆惠等奏言臣等至特訥格爾地方與侍衛圖  
倫楚等會合隨遣員前往尋賊踪跡二月初十  
日至濟爾瑪台木壘地方遇副都統鄂博什帶  
兵五百名接濟糧餉并解到馬匹駝隻隨派臣  
隊內兵二百名圖倫楚隊內兵五百名同鄂博  
什帶來兵五百名共一千二百名臣同哈寧阿  
三格圖倫楚達禮善鄂博什等帶領前往木壘  
烏蘭烏蘇庫舍圖等處搜緝巴雅爾扎哈沁人

等其餘臣隊內兵一千六百名圖倫楚隊內兵  
三百名交永貴齊努渾先行帶赴巴里坤奏入  
上諭軍機大臣曰兆惠等沿途勦滅賊衆甫從遠道  
前來今聞巴雅爾扎哈沁等游牧在木壘等處即  
帶兵前往搜捕似此奮勇實屬可嘉著將御用玉  
韞荷包鼻煙壺賞給兆惠以示優眷哈寧阿永貴  
三格圖倫楚達禮善鄂博什等亦著每人賞給玉  
韞荷包鼻煙壺各一件兆惠等仍將勦賊捷音迅

速奏聞

駐劄巴里坤辦事大臣雅爾哈善等疏奏額敏和卓派人曉諭波羅泥都等事宜

雅爾哈善等奏言前令傅魁傳

諭額敏和卓令其派人隨同五十六托倫泰等帶同霍集占使人沙呢雅斯回至葉爾羌喀什噶爾等處並令其寄信曉諭波羅泥都霍集占等今據傅魁報稱額敏和卓已選派回人六名並繕

就寄與波羅泥都等書信俟五十六等抵魯克  
察克即令由吐魯番之南羅卜淖爾一路前往  
回部中途並無厄魯特等在彼阻滯等語臣等  
查五十六等此時應已抵魯克察克即照額敏  
和卓所請令伊等帶同來使即赴回部曉諭奏  
入報

聞

三月癸巳

命郎中蘇章阿等管理輝特人等游牧事務

上諭軍機大臣曰巴蘭泰現在病故輝特人衆游牧事務著蘇章阿前往管理其達什達瓦屬人事務著富森管理

乙未

命議侍郎雅爾哈善

上諭大學士曰據雅爾哈善等奏稱將傳魁殺死莽噶里克之處詢問丑達及隨去兵丁等僉稱莽噶



里克帶領二十一人遇見大兵告稱不堪厄魯特  
騷擾復欲探伊子白和卓信息是以投內地前來  
乃傳魁並不詳問伊所告言語即將莽噶里克殺  
死等語此事雅爾哈善初次具奏尚有慶幸之詞  
即黃廷桂亦不以為非也朕據奏到即謂傳魁辦  
理錯謬降旨拏解審訊今閱丑達等及隨去兵丁  
所言則傳魁之罪實所難逭俟解到審明定罪雅  
爾哈善從前並未叅奏及奉旨查問始將實情究

出其因循草率甚屬非是著交部察議

定邊將軍成衮扎布等疏奏領兵抵巴里坤日期

成衮扎布等奏言臣成衮扎布於二月二十日至巴里坤臣舒赫德於十七日至巴里坤其阿拉善兵五百名察哈爾兵一千名皆至巴里坤惟吉林兵一千名已過安西不日即可全到約計兆惠於此月內亦可來營臣等伏思厄魯特

人衆惡貫滿盈肆行背逆現在伎倆已窮勦滅  
甚易臣等於兆惠未到之前諸務豫行籌辦俟  
其到時公同酌議分路進兵奮力勦賊以副  
皇上訓勉至意其提督李繩武已遵

旨傳諭令其於二月二十一起程回京奏入報  
聞

大學士管陝甘總督黃廷桂疏奏解送進勦馬  
駝數目

黃廷桂奏言臣於本年正月初八日起至二月二十二日節次解送出口馬二萬七千五百餘匹統於三月十五以內以全抵巴里坤已足敷進勦官兵之用尚餘馬二千餘匹亦飭交布政使武忱等隨時補解以足三萬匹之數又於正月初八九等日將靖逆地方牧放駝九百九十餘隻先行解送續據晉省解到駝隻自二月初五日起至二十二日止陸續解送出口駝四千

二百餘隻其餘續到駝隻仍隨時解往應用臣料理馬駝全數出口後即於二月二十四日起程前赴巴里坤軍營奏入報

聞

甘肅巡撫吳達善疏奏查辦軍需情形

吳達善奏言臣奉

命前赴巴里坤路經安西哈密等處見各站供支解運馬匹草料多有不敷即飭軍需局司道武忱

等就近採買撥補復恐輓運稍有遲悞委安西  
道文綬等往來督率臣仍不時稽察臣緣巴里  
坤商辦一切甚屬緊要且索倫阿拉善官兵已  
全抵巴里坤察哈爾吉林等處官兵亦將次陸  
續到營所有各官兵裹帶口糧均須督率料理  
臣現駐劄巴里坤辦理奏入報

聞

丙申

諭定邊將軍成衮扎布等速勦巴雅爾等事宜

上諭軍機大臣曰據兆惠等奏稱領兵至木壘河源  
巴雅爾等游牧早經遷移隨派兵至阿克他斯烏  
蘭烏蘇庫舍圖等處搜捕並無踪跡是以回至巴  
里坤整齊兵力再行進勦等語前曾降旨令成衮  
扎布兆惠等分兵往勦現在巴雅爾等紛紛逃避  
想係聞圖倫楚等領兵追擊畏懼潛逃但圖倫楚  
擊賊之期甚近賊衆必不能遠颺若乘其不備即

將巴雅爾等追擒甚屬易事倘必俟大兵齊赴方  
行進剿則為日稍遲恐賊衆又復遠竄著傳諭成  
衮扎布等即揀選現在巴里坤兵丁迅速追捕仍  
遵前旨辦理不得更留餘孽再觀巴雅爾畏懼逃  
竄則其技已窮即扎哈沁噶勒雜特等亦必互相  
驚竄其勢斷不能驟合大兵一入自可迅奏膚功  
成衮扎布等務宜奮勇辦理

命免副都統鄂博什等議處



上諭軍機大臣曰策布登扎布奏上年大兵自哈薩克撤回時索倫馬甲奇圖賀爾等六人因在額爾齊斯河等處私行打牲至今未回請將領隊副都統鄂博什及叅領索音達爾等交部察議等語鄂博什係領隊大臣索音達爾等乃管兵丁之專員並不留心約束致奇圖賀爾等藉詞打牲至今未回自應交部議處但念索倫兵丁性多愚昧不諳事體且經効力行走鄂博什現又派往西路進兵

著從寬免其議處

丁酉

諭定邊將軍成袞扎布等進兵機宜

上諭軍機大臣曰額敏和卓奏稱噶爾藏多爾濟等  
已於二月初五日遷往伊犁等語噶爾藏多爾濟  
若在原游牧地方則衆厄魯特等自必各據其地  
負隅自固今乃棄其游牧逃往伊犁明係勢窮力  
竭自可不日成擒且伊犁地方達瓦齊及阿睦爾

撒納尚不能據守噶爾藏多爾濟又安能託足惟  
在官兵等奮勇前進乘其不備速行勦滅方合機  
宜再上年擒拏阿逆時因未派兵堵截逃竄之路  
以致逆賊潛逃著傳諭成衮扎布等此次兩路進  
兵務於闔勒奇等險要地方豫行派兵防守至噶  
爾藏多爾濟雖往伊犁其額林哈畢爾噶等處或  
仍係其屬人大兵過後潛來侵犯亦未可定並著  
成衮扎布委派幹員搜捕倘遇伊等存留賊人即

派兵數百名交領隊大臣富德等奮力勦滅

巳亥

駐劄巴里坤辦事大臣雅爾哈善等疏奏定邊  
右副將軍兆惠等抵巴里坤日期

雅爾哈善等奏言二月二十三日副將軍兆惠  
帶兵抵巴里坤諸大臣及員弁兵丁人等仰荷  
天恩陞賞無不感激歡忭現在會同定邊將軍成衮  
扎布等籌辦進兵事宜其叅將邁斯漢亦同兆

惠等前來遵

旨拏解

行在治罪奏入報

聞

辛丑

命副都統唐喀祿傳諭都爾伯特汗策凌等擒賊事  
宜

上諭軍機大臣曰成衮扎布奏達什策凌哈薩克錫

喇等聞俱遷往額爾齊斯等語額爾齊斯地方現  
係都爾伯特汗策凌等在彼游牧今達什策凌等  
見大兵深入紛紛逃竄前往亦未可定著傳諭唐  
喀祿伊赴策凌等游牧時即傳旨曉諭令伊等各  
帶兵丁將逃往之厄魯特等悉行勦滅其戶口牲  
隻等即賞給伊等屬人惟務將賊首解送來京以  
正國法毋任免脫

壬寅

申諭定邊將軍成衮扎布等籌辦分路勦賊事宜  
上諭軍機大臣曰據成衮扎布等奏稱現已議定兩  
路進兵俟馬匹解到即行起程又達什策凌等聞  
已遷往額爾齊斯等語昨已傳諭唐喀祿曉諭策  
凌等派兵擒拏惟是伊等所奏特云賊衆遷往其  
如何擒拏及從何得信之處並未聲明著傳諭成  
衮扎布等悉心籌議或止須伊等分路進勦或尚  
須派北路兵丁協力擒拏如用北路兵丁約計派

兵若干即敷策應著即妥議奏聞並著傳諭策布  
登扎布等豫行籌辦倘需用時即可應時調遣從  
前成衮扎布等曾有採買馬匹之奏今已採買若  
干及現有兵丁若干詳悉奏聞候朕酌量降旨  
命賞喀爾喀公齊旺多爾濟貝子品級

上諭軍機大臣曰策布登扎布奏據公品級齊旺多  
爾濟呈稱現在患病不能効力擒賊其所進馬五  
百匹請免給價值等語觀其情詞懇切殊屬可嘉



著加恩賞齊旺多爾濟貝子品級以示鼓勵

平定準噶爾方略正編卷三十七

欽定四庫全書

平定準噶爾方略正編卷三十八

乾隆二十二年春三月癸卯

訓諭將軍大臣等和衷集事

上諭軍機大臣曰此次將軍成衮扎布副將軍兆惠  
恭贊大臣舒赫德等分路進兵伊等承辦事務雖  
俱有專責仍宜彼此互商斟酌辦理其兩路大兵  
會合後成衮扎布即應統領諸大臣公同商辦方

於公事有濟即哨探隊內大臣等領兵前往與大  
兵相離較遠其一應事宜自當責令專辦至會合  
一處仍宜各按品級統以將軍事權始歸畫一倘  
領兵大臣稍分彼此或互相推諉殊非仰體朕委  
任之意著傳諭成衮扎布兆惠舒赫德富德等當  
以前次將軍大臣為戒務宜和衷共濟迅奏膚功  
朕實有厚望焉

乙巳

諭叅贊大臣唐喀祿等辦理安插厄魯特人衆事宜  
上諭軍機大臣曰唐喀祿等奏稱喀爾喀地方現有  
扎哈沁特楞古特奇爾吉斯烏爾罕濟蘭及輝特  
存留人衆約計萬人此等均非善類日久不免滋  
事請將扎哈沁人等令在卡倫內居住特楞古特  
奇爾吉斯烏爾罕濟蘭人等賞給東三省官兵爲  
奴其上年輝特部落遷移時存留七百餘人詢問  
策卜登多爾濟普爾普等如不願歸併同居亦照

例分賞為奴等語唐喀祿等所奏甚是但不應將  
輝特存留人衆更向策卜登多爾濟等詢問方行  
分賞現在輝特人等形跡可疑其應行辦理之處  
已降旨令伊等悉心查察此時策卜登多爾濟普  
爾普等如稍有可疑應即先行勦滅並將其所留  
人等一併酌辦若未辦伊等而先辦其所留人衆  
恐伊等轉藉為口實再扎哈沁人等此時並無別  
情暫令遷至卡倫內居住事屬可行至特楞古特

奇爾吉斯烏爾罕濟蘭人等著即照古爾班和卓  
屬人之例一體賞給索倫官兵為奴其應如何遣  
往之處會同策布登扎布酌量辦理

命革副都統扎爾杭阿職

上諭軍機大臣曰從前自軍營回京大臣奏稱扎爾  
杭阿告稱哈達哈於剿滅古爾班和卓時收獲賊  
人珍珠等物朕以其言無據飭令密查今據舒赫  
德查奏哈達哈並無其事明係扎爾杭阿與哈達

哈素不相能故為此傾陷之計朕辦理諸務一本至公豈肯以一空言而即治人之罪且哈達哈之罪並不在此伊身為將軍帶領大兵任意遲延以致阿布賚脫逃是亦罪有應得扎爾杭阿不以此具奏而反以全無影響之事有意傾軋此風斷不可長扎爾杭阿著革職在粘桿處行走朕簡用大臣寄以間外重任原期同心協力共奏膚功果有應行叅奏之事自當據實陳奏若彼此相傾全不



以國事為重辜恩溺職斷難姑容著傳諭軍營大臣等知之

丙午

諭定邊將軍成袞扎布等籌辦派兵耕種事宜

上諭軍機大臣曰現在大兵前進賊衆諒無不知厄魯特等勢窮力竭必竄入哈薩克境內惟是大兵撤回後伊等仍復占據巢穴終非一勞永逸之計著即於進兵時召幕回人墾種地畝並將帶往綠

旗兵丁派令耕種不特秋成之後可資軍食且使賊人無可歸之路哈薩克勢不能久資養贍必至自相戕賊庶可以永絕根株著傳諭成衮扎布兆惠舒赫德等將作何派令耕種及防守額林哈畢爾噶一帶地方堵禦賊人之處公同酌議一面奏聞一面即領兵前往

諭黑龍江將軍綽爾多等查辦齊木齊格特人等事宜

上諭軍機大臣曰齊木齊格特人等係喀爾喀車臣  
汗部落所屬因伊等肆行搶掠派兵查辦今據納  
穆扎爾奏稱齊木齊格特人等俱因懼罪逃往呼  
倫貝爾地方彼處係黑龍江將軍所轄著傳諭綽  
爾多等務即遣兵查拏將賊首解送京師治罪其  
情罪較重者即在彼處正法餘俱賞給索倫巴爾  
虎等為奴斷不得少事姑息再呼倫貝爾地方人  
內或有賊等戚屬私行藏留者並著嚴切曉諭責

令擒獻倘敢容隱查出一併從重治罪

戊申

諭定邊將軍成衮扎布等籌辦勦滅噶勒雜特人等  
上諭軍機大臣曰據成衮扎布等奏稱哈薩克錫喇  
等帶領噶勒雜特百餘戶遷往額爾齊斯前已有  
旨令唐喀祿堵禦逃竄賊衆若噶勒雜特等逃向  
齋爾地方唐喀祿即可就近辦理等語第噶勒雜  
特人等如不逃向齋爾應作何辦理之處尚未籌

及從前命唐喀祿前往策凌等游牧會同策凌等  
勦滅噶勒雜特人等伊等自能遵旨辦理倘賊衆  
仍在額爾齊斯則應另行籌辦因思大兵進勦後  
即應將喀爾喀兵丁撤回與其回至巴里坤再行  
遣回不若即於撤兵時遣往額爾齊思勦滅賊衆  
再由彼處遣回各游牧較為便捷如喀爾喀兵丁  
不敷調遣現有應撤索倫兵丁亦同喀爾喀一併  
遣往俟將賊人辦竣即由彼處遣回路亦較便著

傳諭成衮扎布等遵照辦理

定邊將軍成衮扎布等疏奏大兵起程進剿日期

成衮扎布等奏言臣等領兵七千名一路由朱爾都斯前進一路由額林哈畢爾噶前進臣成衮扎布隊內派兵一千四百名令富德博爾奔察諾爾卜扎卜鄂穆布等帶領為哨探隊又派索倫兵八百名令明瑞色布騰巴爾珠爾管理

吉林兵二百五十名令滿福管理察哈爾兵二  
百五十名令敏珠爾多爾濟管理喀爾喀兵五  
百名令旺布多爾濟齊旺多爾濟管理綠旗兵  
四百名令明瑞兼管臣成袞扎布舒赫德總統  
督率哨探隊於二月初十日起程大隊於十一  
日起程臣兆惠隊內派兵一千五百名令額爾  
登額鄂卜什達體善順德訥等帶領為哨探隊  
又派索倫兵七百名令三格圖倫楚奇撤布管

理察哈爾兵六百名令端濟布管理吉林兵三百名令愛隆阿管理阿拉善兵四百名令羅卜藏多爾濟管理綠旗兵四百名令三格兼管臣兆惠鄂實永貴總統督率哨探隊於三月初十日起程大隊兵亦於十一日起程臣等同心協力務期迅奏膚功仰副我

皇上簡任之意又現在巴里坤駐劄喀爾喀台吉噶勒桑兵丁敏珠爾等八十三人或自臺站撤回



或由伊犁被圍脫出僉稱情愿効力甚屬奮勉  
內年有疾人員遣回各部落其餘官員兵丁  
六十七人臣成衮扎布帶往効力奏入報

聞

庚戌

諭參贊大臣哈達哈等擒勦輝特部落事宜

上諭軍機大臣曰哈達哈特奏稱據輝特部落護衛  
阿齊呈首策卜登多爾濟差人潛通阿逆並謀逃

竄隨即調兵前往辦理其留駐塔米爾衆輝特等亦移咨策布登扎布派員擒拏分賞喀爾喀等語輝特人衆本與阿逆同謀前曾降旨令策布登扎布等加意防範相機辦理今阿齊既將賊情首告哈達哈即領兵進剿甚合機宜至留駐塔米爾衆輝特等亦不應俱行分賞著將丁壯人等悉行誅滅其婦女酌量分賞喀爾喀方為妥協又策布登扎布奏達什達瓦人衆現在鄂爾昆與塔米爾密

過應將分賞輝特人衆事宜曉諭伊等使其不妄  
生疑懼已令布林託言此項輝特人衆性隻無多  
是以令其歸入哈爾哈地方分駐等語策布登扎  
布辦理甚謬厄魯特生性猜疑若不將實在情形  
曉諭反啟伊等疑懼著即將策布登多爾濟等背  
叛情由及領兵前往擒剿之處明白曉諭達什達  
瓦人等知悉

諭貝子額敏和卓防範回人唐噶塔爾等

上諭軍機大臣曰成衮扎布等奏和據額敏和卓呈報噶爾藏多爾濟所屬回人唐噶塔爾沙呼里等帶領回人一百餘戶現住魯克察克地方應如何安插俟旨遵行等語此等回人即交與額敏和卓管理但伊等久為噶爾藏多爾濟所屬倘有潛通噶爾藏多爾濟之事或乘閒潛逃葉爾羌喀什噶爾等處俱未可定著傳諭額敏和卓加意防範如尚屬安靜令其種地謀生形跡稍有可疑即奏聞

請旨辦理

辛亥

諭陝甘總督黃廷桂等籌辦接濟馬匹事宜

上諭軍機大臣曰西路大兵現已進剿馬匹必須多為豫備巴里坤地方應再備馬三四千匹以資調撥方為妥協著傳諭黃廷桂速為籌辦毋致臨期有誤送到馬匹阿里衮務須派兵加意牧養以備不時之需再大兵進剿厄魯特等自必畏罪投誠

如有前赴巴里坤者即將伊等頭目先行送赴京  
師所屬人衆亦隨即移至內地俟過巴里坤後其  
應行勦滅者即行勦滅所餘妻子酌量分賞官兵  
毋得稍存姑息

壬子

命授兆垣三等侍衛官達色藍翎侍衛

上諭軍機大臣曰副將軍兆惠等遣至行在備朕詢  
問之副護軍校兆垣獎賞藍翎官達色俱隨兆惠

等沿途勦賊奮勉行走兆坦兩次前往噶爾藏多爾濟游牧尤屬勇往著加恩授兆坦三等侍衛官達色藍翎侍衛

乙卯

諭定邊將軍成袞扎布等拏解賊人事宜

上諭軍機大臣曰據將軍成袞扎布等奏稱此次兩路進兵務期擒拏賊首其厄爾錫音等如赴軍營投誠暫行安撫俟凱旋後解送京師等語所奏甚

合機宜衆厄魯特內惟吞圖布並未從逆尚可寬  
恕其餘俱不得稍存姑息再噶爾藏多爾濟所屬  
宰桑達什林沁沙喇沁屯圖卜三人情更可惡務  
將此三人拏獲同噶爾藏多爾濟扎那噶爾布尼  
瑪哈薩克錫喇等一併解送來京倘陣前受傷已  
重即在彼正法以彰國憲

己未

甘肅巡撫吳達善疏奏撥貯已里坤糧餉事宜



吳達善奏言已里坤存貯糧二萬五千七百七十餘石現在支給進勦官兵及駐防屯田各兵口糧籽種僅存九千餘石伏思此次進勦賊衆易如拉朽摧枯將來官兵凱旋及駐防屯田各兵丁需糧甚多臣擬在哈密倉貯內酌撥糧二萬石於四月內運至已里坤其哈密倉儲仍陸續撥運以備支給奏入報

聞

辛酉

命議敘陝甘總督黃廷桂

上諭大學士曰據黃廷桂奏辦解巴里坤軍營馬駝已於各官兵未起程之前全數解到經領兵大臣公同挑驗臚壯堪以乘騎等語黃廷桂此次解送馬駝妥協迅速辦理甚屬可嘉著交部議敘其管解各員弁著查明一併咨部議敘

四月壬戌朔

命原任總兵丑達仍馳驛往巴里坤聽候調遣

癸亥

署安西提督傅魁解至

行在審明正法

上諭軍機大臣曰向來綠營將弁懦弱取巧好為張大是以此番用兵從未委以專任知其不足集事也上年額敏和卓奏莽噶里克附和尼瑪等為逆傅魁現領兵在彼伊久在營行由總兵署理提督

自當感激圖報其所領綠旗兵國家養有年遇  
事驅策亦足鼓舞士衆因即命伊帶兵一千會同  
額敏和卓辦理吐魯番事務適莽噶里克自行投  
來相遇於鹽池達次乃伊並不將莽噶里克擒獲  
審明實情以正國法竟並其所帶二十人盡行剿  
滅其辦理悖謬若此因即拏解行在朕親加鞫訊  
前後情節伊俯首無辭惟稱莽噶里克已自來降  
如僅拏解軍營無以見已之功並令同伊進兵之

丑達對質當時曾勸伊不可遽殺伊亦毫無可辯  
夫以一千之兵遇數十來投之賊何難就擒非若  
猝遇賊衆臨陣對敵不能別白首從之可比乃必  
盡殺無遺是誠何心且原報殺賊三十人而丑達  
在彼所親見者僅二十人其十人則莽噶里克投  
來時所殺之厄魯特也傳魁以他人所殺掩為已  
功其欺誑邀功情罪甚為可惡綠營習氣惡劣如  
此不可不嚴加懲創傳魁著即處斬並將此通行

曉諭提鎮各標營以此為鑒力除從前惡習以肅

軍紀

命免治原任叅將邁斯漢罪

上諭軍機大臣曰原任叅將邁斯漢奉派領兵前往  
採取副將軍兆惠等信息中途並未奮勉行走輕  
聽訛言遽爾回營其恒怯退縮律以軍法罪不容  
誅然尚非傳魁之欺誑邀功者可比邁斯漢著從  
寬別其深罪仍查明伊隊內有無陣亡之人奏聞

另降諭旨

甲子

命查拏千總策卜登治罪

上諭軍機大臣曰先經副將軍兆惠具奏千總策卜  
登陷入賊中未經脫出嗣據侍衛兆坦供稱策卜  
登在噶爾藏多爾濟游牧更換厄魯特服色已降  
旨將伊妻子拏交刑部今復詢軍營前來人等俱  
稱上年策楞進兵時策卜登已更換厄魯特服色

此皆係策楞疎縱之罪而策卜登以蒙古世僕甘心從賊罪無可逭著即嚴行查拏獲日照例凌遲處死並著將伊父雙柱革退侍衛及伊親屬人等俱拏交刑部按律定擬治罪

乙丑

命侍郎雅爾哈善為軍營叅贊大臣留侍郎阿里衮駐劄巴里坤辦理事務

上諭軍機大臣曰前降旨令阿里衮暫留巴里坤代



雅爾哈善辦理事務俟雅爾哈善回至巴里坤阿  
里衮仍赴軍營辦事今大兵已經前進巴里坤無  
緊要事務阿里衮承辦已有端緒而雅爾哈善赴  
行在面聆訓諭軍營一切事宜俱已詳悉指示著  
即前往軍營在叅贊大臣上行走事竣之日成衮  
扎布兆惠舒赫德等俱著遵旨來京定邊右副將  
軍印信即交雅爾哈善掌管留彼辦事其巴里坤  
現在應辦事務即著阿里衮駐劄辦理

署理定邊左副將軍印務策布登扎布疏奏分  
賞籽糧事宜

策布登扎布奏言前因輝特人等在烏蘭古木  
等處耕種奉

旨賞給籽種二百石今策布登多爾濟等潛謀背叛  
現經臣哈達哈等領兵辦理此項籽種無庸賞  
給查烏梁海內大臣察達克等向蒙

皇上施恩賞給口糧伊等感激奮勉著有勞績現在

奉

旨令伊等遷回舊游牧地方懇於此項籽種內賞給  
一百石俾得從容播種以資生理再上年自巴  
里坤前來之台吉噶爾丹達爾扎普爾普策凌  
及扎薩克圖汗部落公旺親扎卜等俱由準噶  
爾地方甫回生計稍艱並請將籽種一百石均  
勻分賞噶爾丹達爾扎普爾普策凌旺親扎卜  
所屬等令其種地自給奏入報

聞

大學士管陝甘總督黃廷桂疏奏塔勒納沁屯  
種情形

黃廷桂奏言前經臣奏請派兵二百名赴塔勒  
納沁開墾屯種本年春間經署鎮臣祖雲龍派  
委都司王麟帶兵乘時墾種今臣往回哈密復  
行飭查據該鎮稟稱塔勒納沁地方從前約有  
地三千餘畝自乾隆七年停種之後歷今十五

六載渠道淤塞開挖修築在在須費人工現在  
上緊開闢止可種地一千五六百畝佈種青稞  
一百五六十石餘地至明歲再行辦理臣查邊  
屯有裨兵丁創始未免稍艱今塔勒納沁荒廢  
地畝既已開墾一千餘畝一二年內自可次第  
修復並飭承辦弁員乘此春深極力墾種隨時  
查報奏入報

聞

丙寅

命拏解輝特賊人策卜登多爾濟等來京

上諭軍機大臣曰哈達哈唐喀祿等分路帶兵擒剿  
輝特人等唐喀祿擒獲策卜登多爾濟並將其屬  
人剿滅哈達哈阿桂僅將普爾普等游牧收取首  
賊普爾普德濟特克什克等俱已脫逃唐喀祿著  
交部議敘哈達哈阿桂俱著交部議處具奏策卜  
登多爾濟等即派委幹員押解來京其未經拏獲

之普爾普等務即嚴加搜捕毋致免脫所有厄魯特屬人等即照伊等奏請分賞烏梁海內大臣察達克等以示鼓勵喀爾喀台吉齊巴克扎卜此次甚屬奮勉著加恩賞帶孔雀翎至投赴科卜多地方之葉克明安公巴桑扎薩克阿卜達什克什克特等原非輝特族類且並無背叛情形著交與策布登扎布派人管理令其自備資斧遷至通肯呼裕爾地方居住

命叅贊大臣納穆扎爾赴科卜多駐劄辦事

上諭軍機大臣曰昨納穆扎爾奏稱齊木齊格特人等聞領兵往拏之信俱逃避呼倫貝爾等處地方伊等領兵追擒朕亦降旨令黑龍江將軍綽爾多等嚴行查辦此事即可完竣北路科卜多地方關係緊要哈達哈在彼駐劄聞輝特人等背叛情形領兵往擒而首犯已皆脫逃殊屬疎忽著傳諭納穆扎爾即將齊木齊格特人等事務交與同往之



喀爾喀王巴扎爾什第等上緊查辦伊即速赴科  
卜多籌辦事務俟納穆扎爾到日哈達哈即回至  
烏里雅蘇台辦事

已已

命查辦喀爾喀各部落應繳馬匹牲畜

上諭軍機大臣曰據策布登扎布等奏稱遵旨豫備  
馬匹牲畜已遣員赴庫倫恰克圖等處購買馬匹  
千匹駝數百隻所有喀爾喀部落應行追繳馬匹

牲隻雖經檄催尚未能如期送到等語此奏辦理含糊上年因衆喀爾喀等誤聽青滾雜卜煽惑將卡倫臺站所有馬匹牲隻遽行帶回各游牧嗣經擒拏青滾雜卜令將馬匹牲隻如數繳還免治其罪已屬朕格外加恩此項馬匹牲隻何得任其延挨至今未繳應即重治其罪若係平日交與各部落牧養之項或有倒斃責令賠補尚可少緩其期著策布登扎布等詳悉查明奏聞請旨

署理定邊左副將軍印務策布登扎布疏奏辨  
理伯什阿噶什游牧

策布登扎布奏言臣等遵

旨將伯什阿噶什游牧劫奪侍衛佛保之為首賊人  
交瑚爾起帶兵擒剿其餘人分賞喀爾喀即行  
文唐喀祿辦理旋據藍翎侍衛齊凌扎卜等摺  
獲造言惑衆之護衛孟克柴巴岱緣孟克柴與  
巴岱同居情密倡言達什達瓦人衆俱已剿滅

我等不如逃走致厄魯特沙賴古勒等搶掠牲  
隻伊等又欲驅趕喀勒占和碩之牧羣經巴岱  
之兄和錐勸阻不從有厄魯特達聞之之向綽  
爾濟喇嘛長史博和勒岱處首告因報知侍衛  
等擒獲解送軍營巴岱於途中病故臣等訊據  
孟克柴等知臺台達巴都噶爾曾奪佐領塞卜  
騰牲隻又責懲數次塞外騰因與孟克柴等糾  
衆搶其牲隻以致達巴都噶爾屬人困窮劫奪

侍衛佛保巴岱業經病故將其子女賞給喀爾喀孟克柴正法梟示塞外騰里應正法但尚無倡逃情事此次又同侍衛等擒獲賊人應請解送到京巴岱之兄和錐曾經力阻厄魯特達啓即行首告俱送往察哈爾旗分安插其伯什阿噶什幼女三人現交喇嘛及長史等看守臣等酌量支給口糧請

旨遵行所餘五十一戶大小二百四十餘口分賞喀

爾喀至臣等前次奉

旨賞給伯什阿噶什貝子伍巴什牲隻應請停止解  
送奏入得

旨伯什阿噶什之幼女及看守人等俱著解送來京

庚午

叅贊大臣哈達哈等疏奏擒獲輝特賊人普爾  
普

哈達哈等奏言輝特賊人普爾普等逃竄臣等

領兵擒拏據察克克所屬烏梁海巴松等拏獲  
厄魯特一名詢知普爾普藏匿山內臣即率兵  
追緝立時擒獲并伊子格楚勒僕人十餘名俱  
經擒拏俟拏獲德濟特克什克等一併解京奏  
入報

聞

壬申

命議敘叅贊大臣納穆扎爾等

上諭軍機大臣曰納穆扎爾等奏稱齊木齊格特賊人什第等逃至呼倫貝爾游牧之西默爾根哈瑪爾地方盡行擒獲其應正法者即已正法餘俱遣往黑龍江打牲處安插等語辦理俱甚妥協著照所奏行納穆扎爾瑚圖靈阿多爾濟濟福伊柱德爾森保瑪尼巴達喇巴扎爾什第德木楚克格勒克巴木丕勒等俱著交部議敘其侍衛官員及喀爾喀台吉內有行走奮勉者著納穆扎爾等查明



奏聞交部議敘兵丁酌量賞給錢糧以示鼓勵

甲戌

命移都爾伯特汗策凌等游牧於烏蘭古木地方

上諭軍機大臣曰據唐喀祿奏稱都爾伯特汗策凌等因向與哈薩克厄魯特等有仇今聞伊等背叛請移游牧於烏蘭古木地方等語策凌等自輸誠以來感激朕恩約束屬人甚屬安靜深堪嘉予今因叛賊扎那噶爾布哈薩克錫喇等肆行猖獗懇

將游牧內移其內附之心益堅唐喀祿即前往料理亦甚妥協著照所請准其赴烏蘭古木游牧并賞給籽種令其耕種至伯什阿噶什之子博東齊等雖與都爾伯特同族歸併居住或仰藉策凌等養贍殊屬未便著將博東齊等送至烏里雅蘇台交策布登扎布等酌量移往通肯呼裕爾或呼倫貝爾地方居住再侍衛佛保奉差赴都爾伯特游牧途中沙克都爾曼濟之弟桑濟擾亂奮力交戰

甚屬勇往佛保已施恩補授頭等侍衛其三等侍  
衛烏林泰著加恩補授二等侍衛虛銜藍翎伊靈  
阿副護軍校鄂多俱著補授藍翎侍衛其受傷及  
陣亡兵丁俱著查明賞卹策凌烏巴什第聞  
知桑濟之信即派貝子瑪什巴圖帶兵奮擊甚屬  
可嘉著頒賜策凌策凌烏巴什瑪什巴圖等御用  
荷包以示優眷至都爾伯特台吉布圖庫班珠爾  
乃新降之人在卡倫派出馬匹接應佛保亦應獎

賞俟伊等移往呼倫貝爾時赴烏里雅蘇台軍營  
各加恩賞給緞匹著傳諭策布登扎布遵照辦理  
定邊將軍成袞扎布等疏奏派兵屯種闢展地  
方事宜

成袞扎布等奏言臣等奉

旨於進兵之時先應勘定地方派兵屯種以濟軍食  
並令厄魯特等無從退回復踞舊地

審慮周詳切中窾要臣等詳看吐魯番地方直通伊

犁兼以各處回城聲息相通應即于吐魯番派  
兵屯種現在額敏和卓已駐劄此處尚有開展  
地方地勢寬展可資屯種即將臣等所帶綠旗  
兵丁派令屯田交與副將閔相師督率管轄並  
令額敏和卓父子嚴密防範地方管束屬人與  
閔相師協同辦理奏入報

聞

乙亥

諭定邊將軍成袞扎布等籌辦回部事宜

上諭軍機大臣曰據成袞扎布奏前遣侍衛五十六  
托倫泰帶同霍集占使人沙呢雅斯至回城曉諭  
因中途阻滯仍回至魯克察克地方現今伊等隨  
營行走遇便再行遣回先請行文波羅泥都霍集  
占責令前來投順等語所辦尚合機宜第波羅泥  
都霍集占俱極狡詐而霍集占為尤甚伊等不即  
前來投順明係別生異心即應派兵擒拏特因厄

魯特等尚未辦竣而伊等亦並無附和厄魯特之事倘行文深責伊等畏罪生變或反依附厄魯特轉致更生事端不若暫行停止俟辦理厄魯特諸務完竣仍令沙呢雅斯前往曉諭波羅泥都等如親身來歸亦即擒拏解京否則即派兵前往勦滅成衮扎布等務宜詳慎籌辦

丙子

命叅贊大臣唐喀祿等領兵駐防額爾齊斯聲援西

路

署理定邊左副將軍策布登扎布等奏言賊人  
哈薩克錫喇等聞已逃向額爾齊斯地方應於  
阿爾台山梁等處駐劄兵丁邀截賊人臣於副  
都統瑚爾起所領兵內派三百名並派出科卜  
多駐劄兵丁五百名令郡王品級車木楚克扎  
布帶領前往叅贊大臣唐喀祿現在都爾伯特  
游牧地方無應辦之事應令唐喀祿前往統領



再額爾齊斯等處都爾伯特人等熟悉情形並  
令唐額祿詢問策凌等酌派兵一二百名一體  
帶往奏入

上諭軍機大臣曰策布登扎布等籌辦派兵應援西  
路事宜甚屬妥協此項兵丁即派車木楚克扎布  
會同唐喀祿統領駐劄邀截賊衆但須直逼賊人  
逃竄處所方足以資策應如赴額爾齊斯已遇賊  
人踪跡即奮力勦捕或更應深入亦不得退縮中

止唐喀祿等務宜奮勇辦理其官兵所帶口糧不妨多為豫備著裹帶口糧四箇月前往至唐喀祿所辦都爾伯特游牧事務現在伊等甚屬安靜原無所事倘有應行呈報事件即傳諭策凌等就近呈報駐劄科卜多大臣等查辦並著策布登扎布派出喀爾喀大員一人赴都爾伯特游牧管理事務

丁丑

命獎賞軍營効力人員

上諭軍機大臣曰據副將軍兆惠等奏稱現在進兵  
兩次擒拏賊衆詢問賊人踪跡奮勇前往等語此  
兩次効力人等著查明賞給銀兩其有奮勇爭先  
者準其帶翎陣亡人員亦著查明具奏賜卹

命安插達什達瓦部落喇嘛於熱河

上諭軍機大臣曰據策布登扎布奏達什達瓦部落  
人衆生計稍艱等語達什達瓦人衆現在加恩撫

綏其部落內所有喇嘛等著遷至熱河寺內居住  
有願將伊父母兄弟同來者悉聽其便

平定準噶爾方略正編卷三十八

欽定四庫全書

平定準噶爾方略正編卷三十九

乾隆二十二年夏四月己卯

命郎中三寶前往烏里雅蘇台軍營辦理糧餉事務

調內閣學士阿思哈回京供職

辛巳

命獎賞擒獲輝特賊人德濟特克什克等之烏梁海

內大臣察達克等

上諭軍機大臣曰輝特賊人德濟特克什克等懼罪  
逃竄經官兵分道擒拏俱已弋獲察達克感戴朕  
恩奮勇効力深堪嘉予前已授為內大臣著加恩  
將伊子塔斯呼勒補授藍翎侍衛並賞緞六端茶  
葉二十封圖布慎赤倫烘郭等亦各著有勞績如  
有未經賞翎者准其戴翎並各賞緞五端茶葉十  
五封扎薩克台吉齊巴克扎卜著賞給公品級頭  
等台吉德勒克丕勒索倫佐領瓦濟爾等俱著賞

給孔雀翎以示獎勵其首告策卜登多爾濟潛通  
阿逆之厄魯特尼瑪根敦扎卜及遣赴軍營報信  
之阿齊俟伊等到京酌量加恩所有尼瑪根敦扎  
卜阿齊等親屬戶口俱著編入察哈爾旗分安插  
哈達哈阿桂前因疎縱首賊飭部分別議處今既  
經擒獲著加恩寬免

叅贊大臣哈達哈等疏奏解送厄魯特尼瑪赴

京

哈達哈等奏言厄魯特尼瑪原係阿睦爾撒納之兄沙克都爾宰桑因阿逆謀害沙克都爾尼瑪逃避伊犁上年叅贊大臣富德進兵時因其熟悉哈薩克地方帶往嚮導與其子們都行走甚勤是以令歸入策卜登多爾濟游牧居住此次首告策卜登多爾濟潛通阿逆之事尼瑪根敦扎卜等公同商議遣阿齊赴軍營報知臣等倉猝帶兵尼瑪被擒聲訴緣由始行釋放是以



將伊妻孥等五十一名存留並將尼瑪同策卜  
登多爾濟等解送京師以備質對奏入報

聞

壬午

諭叅贊大臣唐喀祿等嚴緝阿逆蹤跡

上諭軍機大臣曰昨哈達哈等奏策卜登多爾濟等  
遣人潛通阿逆約期逃竄阿逆聞知未必不親身  
迎赴現在唐喀祿車木楚克扎布等領兵前往沿

途務期加意緝訪一遇賊蹤立即擒拏並著傳諭  
哈達哈嚴飭各卡倫派兵巡緝再策卜登多爾濟  
等遣往之人自必同至游牧務即弋獲解京倘任  
其脫逃大有關係哈達哈等務宜詳慎辦理

甲申

命授都統巴祿副都統哈寧阿為叅贊大臣

上諭軍機大臣曰昨經降旨兩路大兵勦滅賊黨後  
將軍成袞扎布副將軍兆惠叅贊大臣舒赫德等

俱著回京其定邊右副將軍印務交雅爾哈善管理現在巴祿哈寧阿俱赴行在面聆指示著仍回至軍營授為叅贊大臣協同雅爾哈善辦事

戊子

諭定邊將軍成袞扎布等會兵擊賊事宜

上諭軍機大臣曰副將軍兆惠奏據巴圖魯侍衛奇徹布等拏獲賊人詢知哈薩克錫喇巴雅爾等由額爾齊斯逃向伊犁等語賊人等若徑赴哈薩克

則追擒尚需時日今逃入伊犁不日應即遇大兵掩襲朕意一路由朱爾都斯一路由闐勒奇前往至伊犁附近地方會合一處擒剿甚易著傳諭成衮扎布兆惠等現在兩路大兵約於何地會合務期籌畫妥協迅速辦理

叅贊大臣阿桂疏奏赴烏里雅蘇台辦事日期  
阿桂奏言臣前奉

諭旨令赴烏里雅蘇台協同署將軍策布登扎布辦

理事務因有擒拏輝特賊人之事經臣奏請會同叅贊大臣哈達哈辦理今賊人德濟特克什克等俱經拏獲臣即遵

旨由科卜多前赴烏里雅蘇台辦事奏入報聞

己丑

定邊右副將軍兆惠等疏奏扎那噶爾布襲殺噶爾藏多爾濟情形

兆惠等奏言四月初八日臣等領兵至呼圖畢  
遇從前坐臺之察哈爾鄂達木稟稱本月初一  
日尼瑪攜帶羊酒慫恿扎那噶爾布殺死噶爾  
藏多爾濟及其親屬人等聞扎那噶爾布即往  
博羅塔拉坐台吉床又聞衆喇嘛云尼瑪又欲  
謀害扎那噶爾布往迎阿睦爾撒納令其管理  
準噶爾地方現在扎那噶爾布自安濟哈雅起  
行未久等語看來賊人逃竄未久尚未知大兵

前來之信迅速追擒不難弋獲但大兵一近賊  
尾賊必潰散應先派兵數百名繞出前途邀截  
夾攻方不虞其漏網隨行文哨探隊內叅贊大  
臣富德等豫為堵截續於初九日至哈齊克地  
方據叅贊大臣富德咨稱初七日總管端濟布  
等先至瑪納斯地方生擒得木齊鄂羅斯並收  
獲男女三百餘人馬駝牛羊約計二千有餘詢  
知扎那噶爾布移往博羅塔拉尼瑪移往朱爾

都斯扎哈沁游牧移往濟爾哈朗等語伏思賊人蹤跡現已偵探確實臣等惟有垂其內亂攻其不備奮力進剿以副

皇上委任之至意奏入報

聞

諭定邊將軍成袞扎布籌辦回部及防範阿逆事宜上諭軍機大臣曰據兆惠奏扎那噶爾布遣人糾合回部為霍集占等所拒等語看來回人波羅泥都



霍集占等原未附和厄魯特特徘徊觀望未即前來投順此時若仍遣五十六等帶領伊來使沙呢雅斯前往招撫如將阿敏道等送回則彼處情形皆可洞悉第波羅泥都等生性狡猾即使歸降亦不得仍居葉爾羌喀什噶爾等處著於吐魯番巴里坤二處酌量指給一地令其遷移稍有推托仍行拏解來京著傳諭成衮扎布等遵照辦理再阿逆一聞噶爾藏多爾濟被殺或脅從哈薩克人等

乘機前來亦未可定伊若自投天網大兵相值正可立即掩獲或聞大兵已抵伊犁中途逃竄尤當豫為堵截如上年伊脫逃時經過之阿勒坦額默勒嶺及伊犁附近之閼勒奇一帶地方務須派兵加意堵禦成袞扎布等其悉心籌酌辦理

庚寅

諭定邊將軍成袞扎布等協擒阿逆事宜

上諭軍機大臣曰兆惠富德等先後奏到阿逆與哈

薩克不睦回至準噶爾搶掠扎那噶爾布游牧富  
德帶兵追襲勦滅賊黨甚衆阿逆不敢迎敵望風  
而遁追至噶順地方遣兵豫堵逃入俄羅斯去路  
兆惠亦即領兵同追等語此次兆惠富德奮勇追  
捕俱協機宜但兆惠所奏整頓後隊兵丁先辦哈  
丹等游牧事竣再同將軍成袞扎布併力辦理等  
語尚屬未協現在兩路分兵前進特為勦滅厄魯  
特賊衆若豫知阿逆前來則當并為一隊方合機

宜今蒙

上天眷佑使賊自投天網適遇大兵理應先擒首賊其  
他厄魯特等皆可從容辦理著即傳諭成衮扎布  
等兩路大兵剋期會合務躡阿逆逃竄縱跡併力  
擒獲並傳諭衆厄魯特等有能擒獻阿逆者不特  
寬宥其罪更當加以重賞反覆開導令伊等擒賊  
自効以贖前愆至阿逆逃竄之路不過哈薩克俄  
羅斯二處如逃入俄羅斯則自可申明成例向彼

索取若哈薩克既與阿逆不睦將軍等領兵赴彼  
曉諭利害自必速為擒獻成袞扎布等遇此機會  
務宜奮勇辦理迅奏膚功

五月辛卯朔

命安插伯格里妻室屬人等於察哈爾

上諭軍機大臣曰達什達瓦之弟伯格里妻室已係  
孀居無可依恃懇請移入內地情殊可憫著加恩  
准其攜帶屬人赴察哈爾正黃旗居住

命議卹坐臺人員

上諭軍機大臣曰昨據兆惠等奏稱上年托多克古爾圖二處坐臺人員在額卜圖地方遇賊戕害筆帖式二員等語此等人員雖非陣亡可比情亦可憫應酌量加恩著將軍成袞扎布等查明咨部照例議卹

壬辰

申諭叅贊大臣唐喀祿等領兵擒賊事宜

上諭軍機大臣曰昨兆惠具奏富德領兵擊敗阿逆  
現在追擒並派鄂博什帶兵二百名赴額爾齊斯  
納林郭勒等處擒勦阿逆存留之烏梁海等語現  
在唐喀祿等領兵赴額爾齊斯地方協同西路擒  
勦逆賊計唐喀祿等由北路抵額爾齊斯路途較  
近應在鄂博什未到之前領兵先赴從前不過因  
哈薩克錫喇尼瑪等逃竄至彼令唐喀祿等協力  
擒拏今阿逆自投天網復遇大兵擊敗無路奔竄

或亦逃入額爾齊斯納林郭勒等處均未可定著  
即傳諭唐喀祿等迅速前往先將阿逆所留烏梁  
海等盡行勦滅仍加意偵探阿逆蹤跡奮勇堵截  
務期弋獲再上年辦理烏梁海時尚多脫逃此時  
有潛入俄羅斯及藏匿山谷者唐喀祿鄂博什等  
陸續到彼並將沿途所有烏梁海等悉力搜捕毋  
令脫逃

甲午



訓諭定邊右副將軍兆惠等

上諭軍機大臣曰覽兆惠節次具奏伊並未前往擒  
拏阿逆惟責令富德一人實屬非是兆惠係領兵  
將軍即應隨富德哨探隊後奮勇前往賊人聞將  
軍親赴必加畏懼且可與富德併力協擒方為妥  
協阿逆情形已感正可乘此機會殲滅首惡至於  
其餘賊衆儘可從容辦理昨因兆惠有俟將軍成  
袁扎布大兵到日商同辦理之語已傳旨曉諭令

其迅速前往毋致後期乃伊尚遷延未行即或尚有應行擒勦賊衆不過派一二人搜捕或移咨成衮扎布辦理俱屬可行且伊又移咨富德令留額爾登額端濟布二人更不可解從前擒拏阿逆時策楞未經親身接應王保朕即重治其罪兆惠寧不知之耶著傳旨申飭並著傳諭成衮扎布舒赫德等此時伊等兩路大兵應已會合即多選兵丁馬匹速行接應富德務期擒拏首賊毋稍遲回觀

望迅奏膚功

乙未

定邊將軍成袞扎布等疏奏遣員曉諭回人事  
宜

成袞扎布等奏言從前奉

旨遣往回城之五十六托倫泰等經臣等帶至軍營  
酌量遣往今於四月初五日領兵至阿勒輝河  
據沙喇斯宰桑三都克懇請隨營効力查沙喇

斯瑪呼斯兩鄂拓克人衆並未從賊而三都克甚屬黽勉是以准其隨營所有遣往曉諭回人之員即令其從三都克等游牧處起程赴庫車等處據三都克稟稱路徑甚便且請派人護送前往即於初六日令托倫泰五十六等帶領霍集占來使沙呢雅斯等前赴回城曉諭奏入報聞

諭駐劄巴里坤辦事大臣阿里衮巡查臺站事宜

上諭軍機大臣曰據阿里袞奏稱巴哈庫蘇臺站遇賊搶掠已遣員前往安設等語此等賊人非沙克都爾曼濟逃竄屬人即係附近之嗎哈沁等現在巴里坤無應辦事務即著阿里袞選派兵丁數百名往來巡查搜捕臺站自可肅清俟雅爾哈善哈寧阿等到日交與伊等辦理阿里袞仍回至巴里坤辦理事務

丙申

命遷移都爾伯特汗策凌等游牧於和通呼爾哈淖

爾地方

上諭軍機大臣曰哈達哈等奏稱都爾伯特汗策凌等懇請移游牧於和通呼爾哈淖爾等語前因策凌等生計未能充裕曾賞給籽種並令赴烏里雅蘇台支領口糧三月以示體卹今請移住和通呼爾哈淖爾游牧著即照所請行策凌烏巴什如願同往居住或就近在科卜多布延圖游牧亦從其

便伊等遷移後已逾耕種之期前次所賞籽種著  
即作口糧賞給如尚需接濟即於科卜多等處存  
貯糧餉內酌量賞給

命免治逆賊青滾雜卜幼子巴里等罪

上諭軍機大臣曰據策布登扎布等遣員押解逆賊  
青滾雜卜幼子巴里及伊媳二人來京伊等皆係  
逆賊親屬律應正法第念青滾雜卜祖母原封貝  
勒博貝之妻巴勒津年逾八旬孤苦無依博貝亦

曾著勞績不忍令其絕嗣著加恩將巴里等免其  
正法仍著策布登扎布傳諭巴勒津如情願赴京  
即將伊孫及孫媳等交伊同住以示格外優卹之  
意

戊戌

諭定邊將軍成袞扎布等安插厄魯特投誠効力人  
等

上諭軍機大臣曰據成袞扎布等奏烏魯特宰桑錫



克錫爾格格屬人等稟稱錫克錫爾格及巴圖爾烏  
巴什等知阿逆現在博羅塔拉擬即領兵擒獻大  
兵亦即迅速前進等語成袞扎布等聞錫克錫爾  
格等有擒賊自効情形即日領兵前進甚合機宜  
逆賊窮蹙已極官兵到彼自可立即擒獲若俟錫  
克錫爾格等擒賊來獻則伊等係効力之人應行  
加恩不便一體辦理但亦不得仍歸原地方居住  
俱著遷至內地安插以杜後患即三都克亦並未

從賊今復在軍營効力俟事竣後亦令伊等屬人  
遷入內地或在通肯呼裕爾或在察哈爾酌量安  
插其老幼人等不必悉令遷移著同內地派往駐  
劄兵丁同住酌量授總管職銜一二員約束毋庸  
照從前留各鄂拓克舊名及補放宰桑等職銜成  
袁扎布等即遵照辦理

命獎賞藍翎伍山赴西路軍營

上諭軍機大臣曰獎賞藍翎伍山熟悉準噶爾情形

著賞銀五十兩馳驛前往西路軍營交將軍成衮  
扎布差委効力

壬寅

諭定邊將軍成衮扎布等沿途勦賊事宜

上諭軍機大臣曰昨據成衮扎布奏稱巴圖爾烏巴  
什等欲擒阿逆呈獻今據兆惠奏巴圖爾烏巴什  
自稱係噶爾丹策零之婿帶領集賽人等前往伊  
犁等語前後所奏情節不同著將兆惠摺錄寄成

袁扎布閱看伊等兩路大兵自當會合即確探阿  
逆逃竄處所奮勇擒拏毋致疎縱巴圖爾烏巴什  
既前往伊犁必與大兵相遇成袁扎布即詳察情  
形辦理不得因其有擒賊自効之言輒行寬縱如  
果擒獻阿逆即遵照昨降諭旨令其遷移內地斟  
酌辦理再兆惠摺內稱扎那噶爾布等煽惑克勒  
特烏魯特各鄂拓克令尾隨大兵之後搶掠臺站  
等語克勒特烏魯特等俱在朱爾都斯一帶游牧

並著成衮扎布就近發兵先行勦滅

定邊右副將軍兆惠等疏奏擒勦賊人鄂勒錐  
等

兆惠等奏言據副都統鄂博什報稱四月二十  
一日領兵至喀喇烏蘇遇庫圖齊訥爾宰桑原  
任散秩大臣鄂勒錐等帶領三十餘戶大兵交  
戰斬賊一百二十餘人鄂勒錐及伊妻子俱經  
擒獲旋因鄂勒錐受傷身死呈獻首級臣查驗

屬實奏入報

聞

駐劄巴里坤辦事大臣阿里袞等疏奏吐魯番屯種情形

阿里袞等奏言吐魯番屯種事宜臣等酌派副將閆相師經理今據報稱該處所種大小米二種小米約於四月中旬耕種大米約於五月初旬耕種現在自四月初九日至二十三日已種

小米二千三百四十畝此後再行接種大米又據定邊將軍成袞扎布等將新附回人沙呼里伯克托克托等留於吐魯番種地亦請給發籽種令其耕種臣即飭交哈密辦糧官員照數運往奏入報

聞

癸卯

命定邊將軍成袞扎布等遣員曉諭左右哈薩克

上諭軍機大臣曰昨據兆惠奏阿逆窮竄情形自可計日就俘惟左右哈薩克地方應豫行遣人曉諭已降旨令成袞扎布等遣員赴阿布賚處開示利害令其擒獻三等侍衛布袞藍翎明嘉薩爾熟悉彼處情形著馳驛前往軍營交與成袞扎布等選派侍衛數員帶領前往阿布賚有欲圖阿逆之意此時未必再行逃往其右部哈薩克特柳克或尚容留阿逆亦未可定第遣員徑赴右部哈薩克恐



伊等墮入賊計飾辭容隱著布袞等先赴阿布賚  
游牧明白曉諭即令阿布賚遣人同往右部俾知  
阿逆反覆無常斷難容留致貽後悔仍諭以天朝  
威德如果擒獻自當格外加恩一面帶兵前往索  
取成袞扎布等務宜妥協辦理又兆惠奏稱喀喇  
沁鄂勒錐之子敦多克戕殺伊父同土爾扈特舍  
楞遷往庫克烏蘇喀喇塔拉等語敦多克情罪可  
惡大兵到彼務即拏解來京毋得任其免脫

諭駐劄巴里坤辦事大臣阿里袞等籌辦厄魯特賊衆事宜

上諭軍機大臣曰阿里袞等奏稱投至巴里坤之厄魯特孟克濟等六名即帶至奎蘇地方正法等語厄魯特等反覆狡詐飾詞投順旋即生變是以降旨令阿里袞等嚴行辦理毋事姑息第奎蘇地方離巴里坤甚近現在止辦理數人尚屬可行倘遇大隊賊衆即在彼處正法保無一二逃竄之人洩

漏其事賊衆勢必畏懼不前殊未妥協著傳諭阿  
里袞等嗣後如有此等投至賊人或由軍營解到  
之厄魯特等俱委員解送至嘉峪關內再行分別  
辦理沿途仍飭委員等小心防範毋致脫逃亦不  
得任其洩漏

丙午

定邊將軍成袞扎布等疏奏勦滅烏魯特宰桑  
錫克錫爾格等

成袞扎布等奏言臣等遣烏魯特得木齊濟木  
巴等傳宰桑錫克錫爾格前來詎錫克錫爾格  
將濟木巴等看守臣等即派兵三百名交總管  
溫布侍衛老格等往擒共殺烏魯特等六十餘  
人俘獲八十餘人駝馬牛羊甚多復曉諭濟木  
巴等擒獻錫克錫爾格隨據濟木巴及孟克濟  
爾噶爾羅卜寨巴顏哈什哈等四人殺死錫克  
錫爾格呈獻首級驗明屬實臣等復遣侍衛哈

清阿將錫克錫爾格母妻幼子及屬人等俱行  
正法查詢烏魯特等惟錫克錫爾格帶兵往迎  
阿逆因此抗拒其餘尚未從賊至得木齊濟木  
巴孟克濟爾噶爾甚屬奮勉請授濟木巴為總  
管孟克濟爾噶爾為副總管其應帶往軍營者  
酌量帶往奏入

上諭軍機大臣曰宰桑錫克錫爾格已為其屬人所  
殺成袞扎布等即將得木齊濟木巴等分別授為

總管副總管尚屬妥協惟是厄魯特等生性兇殘  
互相戕賊斷不可少事姑息前命將軍等進勦各  
鄂拓克時務將賊衆勦滅其餘老幼人等暫行安  
撫酌量擇其人尚可信者授為總管副總管以資  
約束不得照從前留各鄂拓克舊名仍授為宰桑  
收楞額等名目屢次降旨甚明今成袞扎布等所  
奏原不過一時暫為權宜事竣仍當分別辦理即  
如錫克錫爾格詭稱帶兵擒獻阿逆乃反與阿逆

同謀情罪可惡今雖為其屬人所殺而濟木巴等  
又安能保其不生他變成哀扎布等務宜加意防  
範稍有可疑即行正法至現在軍營之三都克令  
其回至游牧辦理亦要仍須留心體察果否實心  
効力毋墮奸計

署理定邊左副將軍印務策布登扎布等疏奏  
拏解擅離臺站之阿扎喇等來京

策布登扎布等奏言從前擅離臺站人等奉

旨解京治罪查伊勒巴爾和碩臺站喀爾喀巴特瑪等七人烏蘭烏蘇阿克他斯臺站巴爾什貴等九人均應拏解今據貝勒旺布多爾濟旗內查出阿扎拉一名郡王品級車木楚克扎布旗內查出巴爾什貴信敦益克根克濟爾噶爾共六名臣即派員解送赴京餘俟陸續拏獲再行解送再聽從逆賊青滾雜卜擅離卡倫之巴爾達納達木巴伊達瑪等一併解送京師治罪奏入



報

聞

署理定邊左副將軍印務策布登扎布等疏奏  
遴選公米什克管理都爾伯特游牧事務

策布登扎布等奏言臣等遵

旨令派喀爾喀扎薩克一員管理都爾伯特游牧事  
務查扎薩克公米什克人甚歷練應請派往管  
理其所管喀爾喀臺站事務請交與公達什管

理奏入報

聞

丁未

定邊將軍成袞扎布等疏奏回部情形

成袞扎布等奏言臣等帶兵至袞昭哈辦理克勒特烏魯特游牧四月二十七日據差往葉爾羌等處之五十六托倫泰報稱我等至瑪呼斯沙喇斯等游牧易換馬駝欲往庫爾勒城沙喇

斯辦事得木齊根丕勒等呈報兩和卓木背叛  
將差往之副都統及兵丁百人俱行殺害等語  
我等不信其言因起程至海都之拜姓圖住宿  
有庫爾勒回人等告稱現在葉爾羌等處回人  
俱叛殺害官兵我等係伯克托克托屬人感激  
大皇帝天恩故來告知斷不可前去等語雖與根丕  
勒等所報相合未可遽信為實隨於沙喇斯等  
游牧派兵往布古爾等處捉生詢問再行呈報

等因併將回人薩替阿克薩噶等送至軍營臣等詢問薩替阿克薩噶據供兩和卓木將副都統阿敏道等一百餘人在庫車城看守今年三月間有庫車城伯克呼岱巴爾氏伯克呢雅斯聞兩和卓木欲害官兵暗行通信阿敏道等遂步行脫出殺回人三十餘兩和卓木即遣三百人追及阿敏道等盡行殺害今聚衆二千人欲拒大兵其通信之呼岱巴爾氏亦俱被殺等語

臣等伏思兩和卓木若果殺害官兵固屬罪無  
可逭即拘留不遣亦當勦滅但臣等現於伊犁  
特克斯等處辦理厄魯特等不能即往回部俟  
厄魯特辦定時再行進勦似屬有益查庫車城  
與沙喇斯等游牧相近沙喇斯散秩大臣三都  
克現隨軍營行走頗為効力臣等擬將三都克  
遣回游牧令五十六托倫泰等暫行同住探取  
回部信息再兩和卓木現已背叛則遣來之沙

呢雅斯不可致令脫逃亦交與五十六等嚴加防守奏入

上諭軍機大臣曰成袞扎布等奏稱聞回人霍集占等擾亂戕害副都統阿敏道俟大兵至伊犁即前往回城勦滅等語所奏非是此次進兵專為勦滅厄魯特賊衆其回部事宜俟蕩平伊犁之後原可從容辦理至於擒拏阿逆原議定明歲再行進兵豈料逆賊自投羅網由哈薩克逃回適遇大兵擊

敗率衆數十人奔竄此正機會可乘時不宜失現  
在兩路大兵應已會合即當極力搜捕明正典刑  
其餘賊衆尚可徐徐辦理何論回人縱回人妄逞  
鴟張俟平定厄魯特後再行辦理亦有何難成袁  
扎布等所奏殊不識事體輕重若以阿逆逃竄之  
路正係兆惠等進兵地方竟委其事於兆惠而伊  
等以專辦回部自任尤屬非是現在富德等領兵  
追擒阿逆兆惠逡巡未進朕尚屢次切責若兩路

大兵互分彼此更豈朕簡用之意成哀扎布幼習  
軍旅自能奮勇爭先此等意見必出自舒赫德伊  
赴軍營時朕訓誡至再至三何得遲疑觀望一至  
於是且現在阿逆情形與上年迥不相同伊前與  
阿布賚交結甚深今已成嫌隙勢不能再行逃往  
至右部哈薩克特柳克之容留與否尚在未定且  
上年策楞等帶兵追擒並未深入伊料此次大兵  
亦復如是必潛身於險僻處所苟延殘喘俟大兵



撤回仍復竄入勢所必然此時惟確探逆賊逃竄處所派富德等帶領精兵多給馬匹務期徹底搜捕擒拏首惡以彰國憲其餘賊衆不必即行辦理至霍集占使人沙呢雅斯已派員送還回部如恐其漏洩軍情則即行正法其五十六托倫泰等亦即追回毋庸遣至回部成袞扎布等即遵照妥協辦理

定邊右副將軍兆惠等疏奏拏解賊人巴桑等

送京治罪

兆惠等奏言據侍衛奇徹布報稱領兵至古爾班呼斯坦地方拏獲宰桑巴桑得木齊普爾普達瓦蘇珠克圖等嚴訊阿逆逃竄處所知往巴爾達穆特游牧地方即移知富德會兵前往擒拏並將普爾普達瓦帶往軍營作為嚮導解巴桑蘇珠克圖二人至營查巴桑前歲在伊犁擾亂後蒙

恩寬宥授為內大臣蘇珠克圖係哈薩克錫喇得木  
齊曾授為二等侍衛今復背叛從賊俱係要犯  
臣即派員押赴巴里坤轉送京師治罪奏入報  
聞

己酉

命獎賞都爾伯特汗策凌等

上諭軍機大臣曰哈達哈等奏稱都爾伯特汗策凌  
等因哈薩克錫喇遣得木齊巴圖濟爾噶爾至伊

游牧即行拏解軍營等語策凌等諸事誠心効順  
甚屬可嘉今因哈薩克錫喇等背叛即將所遣屬  
人拏送軍營深明大義著加恩賞給策凌等緞疋  
荷包以示優眷

原任千總策卜登正法

上諭軍機大臣曰千總策卜登派往臺站辦事當厄  
魯特擾亂之時叛入噶爾藏多爾濟游牧改易厄  
魯特服色甘心從賊情罪可惡著即凌遲處死

叅贊大臣納穆扎爾疏奏前赴布延圖辦事日期

納穆扎爾奏言臣于五月初七日抵烏里雅蘇台遵

旨前往布延圖地方駐劄辦事更替叅贊大臣哈達哈回至烏里雅蘇台辦事奏入報

聞

庚戌

拏獲擅離卡倫賊人達什等正法

上諭軍機大臣曰據索諾木喇卜坦等奏協理台吉諾爾津扎卜阿喇卜坦等領兵至瑪塔斯瑪塔干將擅離卡倫賊人達什等拏獲請旨正法等語達什等乃派守卡倫之人擅自逃回復肆行搶掠情罪可惡著將現在拏獲之三十七人即行正法並行文喀爾喀王桑寨多爾濟等轉行傳諭各卡倫人等俾知儆戒協理台吉諾爾津扎卜阿喇卜坦

領兵擒拏甚屬奮勉著加恩賞給緞疋兵丁等每名各賞銀三兩以示鼓勵

平定準噶爾方略正編卷三十九